

Programa Atensaun no Responde Sedu (AtRes) - Revista Situasaun: 19 Set 2011**Kooperasaun no Komprensaun atu Hamenus Tensaun liga ba
Identidade Relijiaun**

Durante fulan Feveireiru – Jullhu 2011, insidente barak hamósu entre grupu relijiaun ne'ebé eziste no grupu relijiaun ne'ebé hakarak hametin sira nian actividades, hanesan halo demonstrasaun (manifestasaun), estraga propriedade, asalta fiziku no mós ameasa.

Iha tinan 2009 programa AtReS fô sai Relatoriu Politika kona-ba asuntu relijiaun¹. Dezde tempu ne'ebá to'o foin daudauk, insidente sira liga ba identidade relijiaun no konflitu hamósu durante monitorizasaun kontinua akontese insidente liga ba relijiaun ho insidente ida seluk. Maibe foin daudauk, insidente hamósu beibeik no mós ligasaun entre insidente sira mós hametin.

Iha comunidade ne'ebé grupu relijiaun foun eziste halo atividade barak, membrus husi grupu relijiaun ne'ebé eziste sinti la kontenti tanba sira hanoin katak dala barak, actividades grupu relijiaun foun nian la fô respeitu ba relijiaun ne'ebé eziste no mós la respeita lisan no kultura Timor nian. Liu-liu, wainhira ema sira troka relijiaun no halo seremonia publika hanesan sarani atu deklara sira nian fiar foun, sira hetan respota ne'ebé negativu husi comunidade sira nian.

Iha comunidade balu, iha duvida kona-ba grupu relijiaun foun sira tanba kompriensaun husi comunidade mak grupu balu sai ONG nomos grupo balun mai duni hodi halo'o atividades relijiozu. Iha konfuzaun mós kona-ba tipu visa ne'ebé missionariu estranjeiru sira uza tanba la iha kategoria visa ba ema ne'ebé halo atividades relijiozu. Iha mós ema balun ne'ebé hanoin katak missionariu sira balun uza visa turista, laós visa serbisu ne'ebé validu.


Konstituisan RDTL nian deklara katak (iha Artigo 45.1) "Iha garantia ba ema ida-idak liberdade ba konxiénsia, ba relijiaun no ba kultu, no konfisaun relijioza sira ketak hosi Estadu." Maibe, agora Governu RDTL no Parlamentu Nasional seidauk prepara politika ka lei atu regula atividade relijiozus. No mós, prosesu rejistu iha Ministériu Justisa la fornese kategoria ida ba grupu relijiaun, ne'e duni grupu relijiaun sira halo rejistu hanesan assosiasaun ka fundasaun tuir *Dekretu Lei 5/2005 kona-ba Orgaun la Lukrativu*, ne'ebé inklui ONG no mós organizasaun non-profit hotu-hotu. Asuntu ida ne'e hamósu konfuzaun kona-ba legalidade grupu relijiaun nian no mós fô sai sentimentu publiku hanesan grupu relijiaun foun sira halo atividades ne'ebé ilegal no la tuir sira nian deklarasaun rejistu.

INFOMASAUN KONABA SISTEMA ATRES

Sistema AtRes (Sistema Atensaun no Responde Sedu) halo monitorizasaun ba rekolla dadus infórmasaun relaciona ho insidente Violénsia hotu hamutuk ho indikadores situasional fulan ne'e nian nu'udar medida ba potencial konflitu ou Violénsia iha futuru husi sub-distritu to'o nivel nasional atu nune'e hodi no aumenta seguransa no comunidade nian kbi'it atu prevene konflitu iha Timor-Leste. BELUN serbisu ho parseria-monitor 84 ne'ebé simu ona treinamentu no hala'o kna'ar ba monitorizasaun iha sub-distritu 42 (ho planu atu kobre sub-distritu 65 hotu iha 2011). Relatoriu AtRes sei utiliza mós husi parseiru sira hanesan oficial estadu iha nivel distritu no sub-distritu no nasional, Ministériu, fórssa Seguransa nasaun, grupu sosiedade sivil hotu, publiku, no sst, atu bele fô ajuda hodi hamenus tensaun atu prevene eskalasaun labele sai violentu iha Timor-Leste.

¹ Iha Setembru 2009, programa AtReS publika Relatoriu Politika ho titulu '*Identidade Relijiaun no Konflitu iha Timor-Leste*.' Kopi elektroniku disponivel iha: <http://www.cicr-columbia.org/wp-content/uploads/2011/06/Relatoriu-Politika-2-Religian.pdf>

Programa Atensaun no Responde Sedu (AtRes) - Revista Situasaun: 19 Set 2011



Programa Atensaun no Responde Sedu (AtRes) - Revista Situasaun: 19 Set 2011**REKOMENDASAUN IMEDIATA**

Programa AtReS nia objektivu mak atu analiza situasaun konfliktu no fahe informasaun ho autoridade oi-oin ne'ebe bele halo asaun ba prevene konfliktu no hametin kapasidade comunidade ba dame. Tuir objektivu ida ne'e, programa AtReS prezenta rekomendasaun hirak tuir mai:

- **Ministériu Justisa**, hamutuk ho BELUN ne'ebé organiza ona seminar kona-ba asuntu ida ne'e iha loron 27 Juñu 2011 no mós fó sai media imprensa atu responde ba topik ne'e iha loron 19 Julu 2011, bele kontinua atu fó sai informasaun publiku iha maneira ativu kona-ba planu Governu nian atu prepara lei ne'ebé bele regula atividade relijiaun nian no mós haklaru prosesu rejistu ne'ebé grupu relijiaun sira presiza uza. Informasaun ne'e presiza uza lingua Tetun no Portugues. Ministériu Justisa mós bele konsidera atu visita distritu balu ne'ebé tensaun sa'e boot foin dadauk (hanesan Baucau no Manufahi) atu halo sesaun informasaun publiku kona-ba asuntu ida ne'e.
- **Departementu Imigrasaun**, ne'ebé foin halo inspeksaun ba organizasaun sira (inklui grupu relijiaun sira) ne'ebé uza ekipa estranjeiru sira, bele fahe rezultadu husi inspeksaun hirak ne'e atu konfirma missionariu sira duni halo serbisu ilegal ka lae (no uza visa turista). Departementu Imigrasaun mós bele halo review kona-ba tipu dokumentu nian ne'ebé nesesidade ba keta kategoria (visa nian) no konsidera atu hatuun numeru surat nian atu halao prosesu efektivu liu.
- **Ministériu Solidariedade Sosial**, liu husi Departementu Harii Paz no Koizaun, bele halo aprosimsaun ho komunidadae balu ne'ebe tensaun sae no mos insidente violensia akontese tiha ona hodi bele fasilita kria dialogu ka mediasaun ba resolve insidente relijiaun.
- **Media** (televizaun, jornal, radiu) presiza halo esforsu atu publika opiniaun no prezenta perspektiva oi-oin husi governu, sosiedade sivil no grupu relijiaun foun sira, duké publika opiniaun husi Igreja Katolika de'it. Nu'une media bele prevene bias (aprezenta perspektiva ida de'it) no kria diskusaun publiku ne'ebé balansu (aprezenta perspektiva oi-oin).
- **Reprezentante Estadu nian** presiza kontinua konfirma prinsipiu Konstituisaun nian ne'ebé liga ba liberdade atu hili relijiaun (Artigu 45) no promova meius demokratika nian atu resolve konfliktu. Deklarasaun (statement) ka diskursu kona-ba assuntu relijiaun presiza fó impaktu positivu ba povu Timor, no prevene hasae tensaun tan.
- **Lideransa Relijiozus ne'ebé ezistente**, atu haklaken lian fuan dame ba sira nian segidores, presiza husu boot atu la uza dalan violensia. No fó apoiu ba instituisaun ne'ebé iha kompetensia hodi halao prosesu kazu sira tuir lei ne'ebé vigora. No mós husu ba FIR presiza halo esforsu atu hasoru ho lideransa grupu relijiaun ne'ebé seidauk tama no resolve problema liu husi dialogu.
- **Lideransa grupu relijiaun foun sira** presiza garantia katak sira nian organizasaun halo atividade ne'ebé legal. Sira presiza deklarasaun sira nian intensaun no objetivu wainhira sira halo rejistu ho Ministériu Justisa no FONGTIL, no sira presiza garantia katak ekipa estranjeiru sira simu visa serbisu. Grup foun sira presiza kolabora hamutuk ho lider lokal sira no halo esforsu hodi simu sira atu halao sira nian atividade. Bainhira grupu sira tama iha comunidade ida, sira bele

Programa Atensaun no Responde Sedu (AtRes) - Revista Situasaun: 19 Set 2011

deklara sira nian presenza iha ne'ebá no hasoru ho lider lokal sira no representante sira husi comunidade ne'ebá hodi nune'e atu la hamosu deskonfia no lian-anin kona-ba sira nian intensaun. Sekarik grupu relijiaun foun sira hetan opozisaun ne'ebé la justu husi autoridade lokal sira, grupu sira bele entrega kazu hanesan ne'e ba Ministériu Justisa atu rezolve problema molok sira hahu atvidiade iha comunidade. Sira mós presiza halo esforsu atu halao komunikasaun diak ho lideransa husi grupu relijiaun ne'ebé eziste no fó respeito ba estrutura sosial no kultural iha comunidade ne'ebá.

- **Polisia (PNTL)** presiza halo esforsu para prevene violencia iha sub-distritu sira ne'ebé grupu relijiaun foun sira tama no halo atvidiade agora daudaun. Polisia bele fornese protesau ba grupu ne'ebé vulneravel liu husi patrolla beibeik no halo intervensaun sedu atu prevene violencia bainhira tensaun hasae iha areia ne'ebá. Resposta ba krime liga ba identidade relijiaun tuir prosesu ne'ebé uza atu resposta ba krime selu-seluk.

INFORMASAUN HUSI RESULTADU MONITORIZASAUN²

- Iha distritu **Ainaro** no **Liquiça**, iha 2009 to'o agora, relijiaun foun sira hanesan Visão Cristã nia Igreja taka no la bele loka, no mós relasaun comunidade ho relijiaun foun la diak no la simu malu to'o agora. Husi monitorizasaun BELUN nian iha Ainaro hatudu duni comunidade Katolik la simu existencia Visão Cristã iha sub-distritu ida ne'e.
- Iha distritu **Manatuto**, **Covalima**, **Ermera** no **Bobonaro**, bazeia ba monitorizasaun husi BELUN hatudu katak, Igreja ne'ebé existente kleur ona, la konkorda atu relijiaun foun hanesan Visão Cristã, Vitoria familia, Testamuña Jehovah atu eziste. Tanba maioria comunidade duvida legalidade relijiaun foun sira, no maneira husi relijiaun foun hodi hala'o atvidiade tama-sai uma, hodi fó impaktu comunidade halo mudansa husi relijiaun ne'ebé iha ona ba fali relijiaun foun.
- Iha distritu **Maliana**, iha dia 18 Outubru 2010, iha suku Ritabou, insidente ida fó rezultadu hanesan uma tolu lideransa 'Visão Cristã' nian mak hetan estraga no mós membrus comunidade nian sunu armazen ne'ebé grupu ida ne'e tau material konstrusaun atu harii igreja. La iha ema ne'ebé hetan kanek ka hetan asalta fiziku.
- Iha distritu **Baucau**, insidente bara-barak akontese:
 - Fevreiro 2011: Viziñu ida husi entidade Katolika, baku ema nain rua husi entidade Testamuña Jehovah iha dalan.
 - Dia 16 de Marsu 2011: iha suku Waili, sub-distritu Baucau Vila, entidade husi Vitoria Familia halo hela atvidiade relijiozu iha uma, derepente entidade husi relijiaun seluk tuda uma ne'ebé halao hela atvidiade relijiozu.
 - Dia 2 de Abril: Iha Suku Trilolo, sub-distritu Baucau Vila, dia 2 de Abril 2011, akontese insidente hanesan, ema ida husi entidade Katolika halo asaun baku ferik ida husi entidade Testamuña Jehovah, tanba la satisfeito ho maneira halao atvidiade tama-sai uma.

² Seksaun ida ne'e tau hamutuk infomasaun liga ba insidente ne'ebe hetan liu husi dadus monitorizasaun husi sistema AtReS. Agora daudaun sistema AtReS aktivu iha sub-distritu 42 (husi total 65) iha distritu hotu-hotu. Nee duni, infomasaun kona-ba insidente ruma ne'ebe akontese iha sub-distritu ne'ebe seidak inklui iha sistema AtReS sei limitadu. Tanba ne'e ita bele hanoin katak iha realidade iha numero insidentes ka konflitu liga ba identidade konflitu ne'ebé boot liu hakerek iha alerta ida ne'e durante periodu Fevreiro 2011 - Julu 2011.

Programa Atensaun no Responde Sedu (AtRes) - Revista Situasaun: 19 Set 2011

- Dia 4 de Maiu: Iha suku Welaha, sub-Distritu Venelale, Distritu Baucau, entidade husi relijiaun Katolika sobu ou estraga Igreja Vitoria Familia .
 - Dia 7 – 9 Maiu: Entidade husi Testamunia Jehovah, halao hela atividade relijiozu, derepenti entidade husi relijiaun Katolika, halo asaun hodi tuda Igreja Testamuña Jova, tanba nafatin, maioria entidade husi relijiaun Katolika, kontra atetudi hodi halo atividade relijiozu tama-sai uma, no halo promeza oin-oin hodi fó influencia ema muda husi relijiaun ne'ebé iha tuir ona.
 - Fulan Juñu: Iha suku Seisal, sub-distritu Baucau Vila, Xefe Suku Seisal halo impedimentu ba Visão Cristã hodi halo Igreja iha suku refere, tanba laiha dokumentus legal kona-ba disenza atu harii Igreja husi Instituisaun relevante.
 - Dia 24 de Juñu: Iha Bacau Vila, entidade relijiaun husi Katolika, Igreja Evangelika Assembleia de Deus, Igreja Protestante Timor Leste (IPTL) no Islam, hala'o protesta asaun demóstrasaun kona-ba existencia relijiaun foun iha Baucau. Tanba Komunitade la satisfeito ou lasimu maneira husi entidade relijiaun foun hanesan Testamuña Jehovah no Visão Cristã ne'ebé hala'o atividade relijiozu tama-sai comunidade nia uma, ho maneira halo desfamasaun no fó promessa fó sasan, ba ema ne'ebé tama ba relijiaun fó'un, hanesan Testamuña Jehovah no Visão Cristã.
 - Dia 17 de Jullu: Iha suku Loilobo, sub-distritu Vemasse, grupu diskoñesidu tuda rahun lideransa ou Pastor husi Vitoria Familia, wainhira halao viajen ba suku Loilobo.
- Iha distritu **Oe-cusse**, dia 1 de Abril, akontese ameasa malu entre entidade sarani Katolika ho Visão Cristã, tanba, sarani husi Igreja Visão Cristã la kumpri akordu ne'ebé hala'o tiha ona, katak Igreja Visão Cristã la bele hala'o atividade relijiozu no Igreja tenke taka.
 - Iha distritu **Aileu**, iha sub-distritu Aileu Vila, dia 22 de Abril 2011, akontese baku malu entre entidade relijiaun Katolika ho relijiaun foun hanesan Visão Cristã. Akontesimentu ne'e mósu bainhira relijiaun Katolika sira fóin sai husi selebrasaun misa Paskua nian. Iha tempu ne'e mós, entidade husi Igreja Visão Cristã nia uma mós, hetan tuda husi ema diskoñesidu. Tanba ne'e entidade Visão Cristã nian ne'ebé tuir grupu hela iha uma ne'ebé hetan tuda, halo reasaun hasoru hodi tuda fali uma husi entidade katolika nian, ho hanoin katak entidade husi katolika mak tuda uma. Ho nune'e mósu konfrontasaun entre grupu Visão Cristã ho grupu Katolika.
 - Iha distritu **Manufahi**, dia 11 de Juñu, akontese asaun protesta husi sarani Katolika ba Responsavel Igreja Adventista nian uma hodi baku responsavel Igreja Adventista, tanba iha entidade balu husi Igreja Adventista hakoi estatua Nosa Señora , Curasaun de Jesus, no Crux Fiksu ba rai kuak ne'ebé fóin deskobre sai husi comunidade balu. [Depois de insidente ida ne'e, media³ hato'o informasaun klaru kona ba insidente ida ne'e, katak ema ne'ebé hakoi estatua halo hanesan ne'e iha tinan 2002, tuir avisu husi padre ida husi Igreja Katolika, tanba estatua nakfera wainhira ninia uma nain hasai nia husi uma no estraga ninia uma. Entaun, insidente ida ne'e la iha ligasaun ho ninia desizaun atu troka relijiaun – ne'e signifika katak reasaun husi comunidade iha Manufahi mak bazeia ba informasaun ne'ebé la loos.] Dia 13 de Juñu, dia 20 de Juñu, nafatin iha Distritu Manufahi, continua entidade husi relijiaun Katolika hala'o asaun hasoru Igreja Adventista, no fó impaktu husi Responsavel Igreja Adventista nia uma mós hetan estragus. Asaun ne'e sarani Katolika continua hala'o protesta liu husi demóstrasaun pasifiku iha dia 25 de Juñu 2011, Sarani Katolika ne'ebé konsentra hela iha suku Letefóho, Aldeia Rialau Sub-Distritu Same Vila, continua hala'o asaun demóstrasaun iha 22 de Jullu 2011, no iha di 25 de Jullu 2011, hodi continua hato'o ejiensia ba Governu katak la konkorda atu

³ Timor Post, dia 4 Augustu 2011, p.1

Programa Atensaun no Responde Sedu (AtRes) - Revista Situasaun: 19 Set 2011

Igreja Adventisa eziste iha Same, no husu ba Governu atu bele kria lei lalais hodi regula atividade relijiaun. To'o agora entidade relijiaun Katolika hala'o asaun konsentra hamutuk, iha fatin ne'ebé prepara ona iha suku Letefóho, Aldeia Rialau, sub distritu Same Vila, hodi hato'o ezijensia liu husi hakerek iha spanduk hodi hein resposta husi Governu.

- Iha distritu **Dili**, dia 13 de Juñu, depois de TVTL hatudu manifestasaun iha Manufahi no relasaun maka'as husi kazu hakoi estatua iha Same, grupu diskoñesidu ba estraga Igreja Adventista iha Fómentu, Comoro, **Dili**.

REKOMENDASAUN TEMPU NARUK

Programa AtReS serbisu iha areia prevensaun konfliktu katak insidente bara-barak liga ba identidade relijiaun hamosu, no mós katak dala barak diskusaun publiku no debate kona-ba asuntu ne'e mak bazeia ba informasaun ne'ebé la loos, lian anin no kompriensaun ba lei ne'ebé la loos. Atu hetan solusaun diak ba situasaun ida ne'e, autoridade estadu sira presiza fasilita dialogu iha nivel nasional bazeia ba kompriensaun ne'ebé loos kona ba prinsipu demokrasia nian no prinsipu legal. No mos autoridade lokal sira, organizasaun sociedade sivil sira, grupu relijiaun sira no membrus comunidade sira bele partisipa iha dialogu atu promova kompriensaun ne'ebe rekonhese papel grupu relijiaun hotu-hotu nian hanesan grupu hotu bele kontribui ba dezenvolvimentu comunidade nian no hari dame.

Ne'e duni, programa AtReS aumenta rekomendasaun sira tuir mai hodi maneja situasaun atual, prevene violencia, hametin toleransia entre relijiaun oi-oin no hapara diskriminasaun:

- **Ministériu Justisa** bele prepara lalais lei atu regula atividade relijiozu no promova diskusan publiku kona-ba asuntu ida ne'e. Ministériu mós bele kria kategoria seluk ba grupu relijiaun sira atu rejistu sira nian organizasaun. No mós Ministériu bele prepara 'politika tranzitoriu' atu husu ba organizasaun relijiozu halo atividades tuir sira nia deklarasaun rejistu no fó 'tempu grasa' ba grupu relijiaun sira atu hadia sira nian rejistu ka halo rejistu foun molok Governu prepara politika foun ba prosesu rejistu.
- **Parlamentu Nasional**, liu husi Komisaun A, presiza fó prioridade ba lei atu regula atividades relijiaun nian hodi estabelese fondasi legal ne'ebé aplika ba grupu relijiaun hotu-hotu iha Timor-Leste.
- **Departementu Imigrasaun** bele konsidera, hamutuk ho Ministériu Negosiasaun Estranjeiru, ideas hodi improva no halo lalais liu prosesu atu fó sai visa serbisu. Iha longu prazu, Departementu mós bele konsidera atu kria kategoria seluk ba ema ne'ebé halo serbisu relijiozu. Maibe to'o tempu ne'ebá, Departementu presiza halo kontrol maka'as kontra ema estranjeiru ne'ebé serbisu ho visa turista.
- **Governu, sociedade sivil no lideransa husi grupu relijiaun sira** bele refórta Fórum Inter Relijiaun ba Toleransia (FIRT) iha distritu Baucau no konvida grupu relijiaun foun sira atu kria mekanismu hodi promove toleransia iha país ida ne'e. Sira bele harii grupu ne'ebé envolve relijiaun oi-oin hanesan ne'e iha distritu seluk atu promove dialogu entre lideransa relijiaun sira.

Programa Atensaun no Responde Sedu (AtRes) - Revista Situasaun: 19 Set 2011

- **Membrus seitor seguransa nian** presiza prepara planu atu fó protesauñ metin ba grupu relijiaun foun sira ne'ebé hetan problema beibeik, iha tempu paz no mós iha tempu bainhira tensaun hasa'e (hanesan tempu eleisaun).
- **Grupú relijiaun hotu-hotu** presiza hanorin membru sira katak sira labele uza violensia atu resolve konflitu no mós hanorin katak ema hotu-hotu iha direitu atu hili no tuir relijiaun ne'ebé sira hakarak, la ho ameasa ba sira nian seguransa fiziku no seguransa iha klamar.
- **Grupú relijiaun foun sira** presiza estuda kona-ba lingua, kultura no lisan komúndade nian molok sira tama komúndade ida. Sira presiza fó respeitu ba estrutura no ligasaun sosial ne'ebé eziste iha komúndade. Sekarik bele, grupu sira bele prepara regulamentu voluntariu atu halo relasaun diak ho membru komúndade sira no grupu relijiaun ne'ebé eziste.
- **Lideransa husi grupu relijiaun sira** bele estabeleze programa ida foun atu fó ajudú non-denominasaun, ne'ebé involve grupu relijiaun oi-oin no halo preparasaun hamutuk autoridade lokal sira. Programa ne'e bele fó apoiu ba komúndade nian dezenvolvimentu no kaer ema hotu-hotu (ema ne'ebé tuir relijiaun no ema ne'ebé la tuir relijiaun). Programa hanesan ne'e mós fó oportunidade egual ba ema hotu atu tuir kursu ka partisipa iha workshop, ne'e duni bele haklaru katak oportunidades no rekursus mak kaer membrus komúndade hotu-hotu, laos ba membrus grupu relijiaun ida de'it.
- **FONGTIL**, nu'udar organizasaun ne'ebé mahon ba sosiedade sivil, atu bele halo monitorizasaun ba atividade NGO sira atu nune'e garante ba NGO sira halo atividade tuir misaun organizasaun rasik. Se karik organizasaun la tuir kriteria ka politika husi FONGTIL, bele halo asaun hodi hapara kedas, hodi prevene atu la masu tan.
- **BELUN**, liu husi programa AtReS, presiza kontinua halo monitorizasaun kona-ba konflitu ne'ebé bazeia ba identidade relijiaun. BELUN mós bele suporta Rede Prevene no Responde Konflitu (RPRK) iha nivel sub-distritu atu implementa atividade ne'ebé promove toleransia. BELUN mos sei kontenua halo kooperasaun ho Ministeriu Justisa hodi hare ba konteudu resultadus husi seminar BELUN ho MInisteriu Justisa ne'ebe hala'o ona iha iha lorañ 27 Juñu 2011.

KONKLUSAUN

BELUN fiar katak maske konflitu liga ba identidade relijiaun apresenta dezafiu boot, konflitu ne'e mós fó oportunidade ba parceiros oi-oin atu bele ezame problema sosial, legal no kultural ne'ebé liga ba asuntu ne'e, no mós harii fondasi metin liu atu promove toleransia entre relijiaun oi-oin. BELUN husu boot ba Governu Timor-Leste, lideransa grupu relijiaun sira, sosiedade sivil no partes seluk ne'ebé interese ba asuntu ne'e atu diskuti no implementa proposta sira ne'ebé temi iha leten, no mós prepara meius seluk tan atu resolve konflitu bazeia ba identidade relijiaun.

Atu hatene liu tan informasaun kona ba asuntu ne'e, bele kontaktu:

Sarah Dewhurst, CICR Program Manager, sd2633@columbia.edu, ka
Maria Marilia da Costa, Belun Program Manager AtReS, bylah.belun@gmail.com.